

Protocol da la radunanza generala dals 3 december 2020, a las 20.30 illa chasa cumünala Misoch

Tractandas

1. salüd dal president e s-chüsas
2. tscherna scrutinadurs
3. prelecziun dal protocol da la radunanza generala 2019
4. rapport annual dal president
5. rapport da la chaschiera e dals revisurs da quint
6. rapports dal schef da cuorsa, schef da turas, delegià Traversada e Stafetta tras Sent
7. mutaziuns ed onurificaziuns
8. tschernas
9. fixar contribuziun annuala
10. program da l'on
11. sguard inavo 100 ons CS Sent ed arrandschamaints da nos club
12. varia

1. salüd dal president e s-chüsas

A las 20.30 po il president Christian Poo salüdar a 17 commembras e commembers (inscrits illa glista da preschentscha). S-chüsats s'han Jon Buchli, Sabine e Roland Staub Kaufmann, Men e Maja Bischoff, Monika Roner, Lilo Mock, Dominique e Coni Benderer, Christoph Weiss, Mischa Weiss, Cla Rauch, Tina Maria Ritz, Nesa Valentin, Dora Erny, Maria Benderer, Reto Rauch, Plasch Caviezel, Gian Caviezel, Marianne Werro, Annursina e Rico Zini, Madlaina e Roland Franziscus, Anna Barbla Buchli, Elisabeth Sarott, Selina Poo, Gianna Rauch e Ruedi Bisang.

L'invid es gnü tramiss tenor statüts, uschè cha la radunanza es abla da trar decisiuns.

2. tscherna scrutinadurs

Sco dombravuschs vegn elet Chasper Buchli.

3. prelecziun dal protocol da la radunanza generala 2019

Il protocol da la radunanza generala 2019 es gnü tramiss insembel cul invid. El vain approvà sainza cuntravuschs.

4. rapport annual dal president

Il president rapporta davart l'inviern passà. Quel resta garanti in memoria pervi da duos situaziuns fich differentas. Dad üna vart l'allegraiva festa da giubileum da 100 ons CS Sent culla gita sül Cuvel da l'Iva, cul püschain, la stafetta giò Sarandschasch e la festa la saira. Per üna gronda part ha dürà quist arrandschamaint da la bunura bod fin illa uras pitschnas dal di davo.

Da tschella vart però giarà eir la finischun da la stagiun d'inviern als 13 marz 2020 ill'istorgia da nos club. La pandemia da corona ha terminà la stagiun da skis bler massa bod e'ns occuparà eir d'ürant la prosma stagiun.

Plünavant raporta il president davart ils ulteriurs arrandschamaints dal club: il tir da tschoccas a Sur-En, la joslada oura Vastur, la gita sü Niruns, l'organisaziun d'occurrentas culs clubs vaschins (Martina – Scuol e la coppa mundiala dad ir cull'assa), ustarias e la stafetta tras Sent. Las radunanzas dal BSV, SwissSki e RPN han gnü lö in fuorma digitala.

Il club ha plünanvat sustgnü a giuvenils talentats cun surtour ils cuosts da las licenzas e la contribuziun pels trenamaints da l'RPN. Eir l'OJ's da Nordic Scuol e l'OJ Motta Naluns vegnan sustgnüts da nos club.

La chaschiera Tina Weiss ha demischiunà da la suprastanza. La tscherna ed ün ingrazchamaint seguan plü tard. Eir il revisur da quints Dur Valentin demischiunescha da sia carica.

5. rapport da la chaschiera e dals revisurs da quint

Quist on serrà giò il quint cun ün guadogn da CHF 1'387.40. Il chapital agen importa uossa CHF 26'479.53.-. Quist guadogn es fich allegraivel, adonta chi's prevezzaiva üna perdita causa las expensas büdschettadas pella festa da giubileum. El es d'attribuir impustüt a la contribuziun dal cumün, a la contribuziun extraordinaria dal cumün pel giubileum da 100 ons ed a la contribuziun da l'Associaziun da skis grischuna chi'd es gnüda pajada oura per entradas chi nu s'ha gnü pervi dal virus da corona.

Ün ingrazchamaint special va als sponsurs chi contribuiscan minch'on vi da premis per las cuorsas, a la butia da Plaz ed a tuot las duonnas chi han adüna darcheu fat tuortas pellas ustarias. Ella ingrazcha a tuots pel sustegn ch'ella ha gnü d'ürant ils 10 ons ch'ella ha fat part da la suprastanza.

Ils revisurs da quint Duri Valentin e Chasper Buchli han revais il quint. Quel vain fat bun cun dar dis-charg als organs respunsabels.

In quist'ocasiun vegna darcheu decis cha la suprastanza possa disponer d'ün import da CHF 1000.- chi sta illa cumpetenzza da decider dal comité sves.

A la chaschiera pertocca ün ingraziamaint special per tuot sia lavur instancabla. Il grond applaus ha demuossà seis grond ingrazchamaint per nos club.

6. rapports dal schef da cuorsa, schef da turas, delegià Traversada e Stafetta tras Sent

Causa assenza dal schef da cuorsa Jon Buchli, rapporta il president a regard la stafetta da giubileum chi'd es gnüda fatta invezza da las cuorsas dal club. 12 squadras cun 4 fin 5 partecipants han giödü ün davomezdi nostalgic. Fich bleras personas han eir sustgnü sco agüdants quist davomezdi.

Il schef da turas, Andri Poo po comunicar chi s'haja pudü far d'ürant l'inviern passà üna tura ufficiala als 23 favrer: Piz Soer – Tiral – Piz Spadla. La seguonda tura ha stuvü gnir strichada pervi da corona. Singuls commembers tilla han fatta amo sco pitschen arrandschamaint privat. Quist inviern esa darcheu previs da far duos gitas. Las datas provisoricas sun publichadas sül plan da l'on. In cas da spostamaints gnissan quels publichats illa chaistina chi's rechatta dadaint l'entrada dal Sport Champatsch.

Il president dà las orientaziuns davart la müdada dal comité da la Traversada. Annursina Zini, Flurin Nuotclà e Reto Rauch speran da pudair realisar quella sco previs la prüma sonda dal mais lügl dal 2021. La traversada dal Vnuost ha stuvü gnir strichada pervi da la pandemia.

Nataglia Caviezel rapporta davart la 37avla Stafetta tras Sent. Quella ha funcziunà fich bain, eir causa il sustegn da Tina Weiss e Christian Poo cul team da l'ustaria. La varianta da far tragets plü cuorts s'ha verificada. I s'han partecipadas 19 squadras. Uossa pon far part eir uffants pitschens ed eir nonas e bazegners han cumanzà darcheu daplü da far la stafetta e cuorran insembel cun lur abiadis. Il concept da l'ustaria es gnü adattà pervi da corona.

7. mutaziuns ed onurificaziuns

Sco novs commembers vegnan bivgnantadas las seguaintas personas: Mischa Weiss, Flurin Alesch Felix e Selina Poo.

Sortits da la società sun: Jon Curdin Felix, Dorota Jacobs ed Emilia Stricker.

Ils seguaints commembers dvaintan commembers libers causa chi sun fingià daspö 40 ons commembers dal Club skiunzs Sent: Maria Benderer, Tina Maria Ritz, Nesa Valentin ed Armon Nuotclà.

Daspö 25 ons commembra e veterana dvainta Dora Erny.

Il president ingrazcha a Duri Valentin per sia lavur e til dà ün pitschen regal. Tina Weiss es statta d'ürant 10 ons in suprastanza. In quists 10 ons ha ella fat üna fich gronda lavur. Culla chascha vaja adüna meglder, ella ha adüna surtut fich bleras incumbenzas ed ha pisserà adüna pel bainstar da tuots. Id ha fat fich bain i'l ravuogl dad homens dad avair inchün uschè creativ. Il president tilla surdà ün regal. Cun ün fich grond applaus arcugnuoscha la radunanza tuot la lavur cha Tina ha fat d'ürant quists ons pel club. Il president spera ch'ella resta inavant fidela ed activ in nos club.

8. tschernas

Tenor statüts ston gnir reelets d'ürant ils ons pèrs il president, la chaschiera, il schef da turas e'ls revisurs. La suprastanza ha grond plaschair da pudair bivgnantar in avegnir a Sabina Stricker in seis ravuogl sco nouva chaschiera chi'd es gnüda eletta cun applaus. Sco revisura s'ha missa a disposiziun Braida Pinggera. Eir ella vain eletta cun applaus. Il president, il schef da turas e'l revisur Chasper Buchli as mettan inavant a disposiziun e vegnan eir els reelets cun applaus.

Uschè as cumpuona il comitè in avegnir seguaintamaing:

president:	Christian Poo
actuar:	Mario Rauch
chaschiera:	Sabina Stricker
schef da cuorsa:	Jon Buchli
schef da turas:	Andri Poo
revisurs da quint:	Braida Pinggera e Chasper Buchli

9. fixar contribuziun annuala

La contribuziun annuala vain fixada sün 25.- fr. per personas sainza commembranza da Swiss-Ski. Ils commembers cun commembranza da Swiss-Ski pajan 50.- fr.

10. program da l'on

Il program da l'on es gnü protramiss e vain preschantà dal president. Tenor ün artichel in gazetta ha lö la cuorsa da pels da Ftan sülla Palma als 19 marz 2021 e na als 12 marz 2021 sco gnü indichà uriundamaing e miss sül program d'arrandschamaints. Uschigliö es gnü fat il program sco üsità. Müdamaints pervi da la situaziun da corona saran però fich pussibels e gnanran dats cuntschaints culla via üsitada.

11. sguard inavo 100 ons CS Sent ed arrandschaints da nos club

Il president dà amo üna jada ün sguard inavo a la festa da giubileum ed ingrazcha a tuot ils partecipants ed agüdants. Eir a la società da giuventüna pertocca ün ingrazchamaint chi han servi d'ürant quella saira. El orientescha cha davo la tractanda varia gnian muossadas amo ün pèr fotografias da quist arrandschamaint. Plünavant muossa el amo trais fotografias dal Cuvel da l'Iva ch'el ha survgni dad ün hom.

12. varia

Andri Linsel manzuna sia dischilusiun invers SwissSki chi publichescha regularmaing in sia gazetta 5 paginas da reclama da regiuns da skis our il Tirol. In quista maniera nu vezza el personalmaing plü ingün motiv da restar commember da SwissSki. El comunichescha quist fat a SwissSki ed intimescha a la suprastanza da ponderar sch'ella vögla eir manzunar la dischilusiun da quist fat a SwissSki.

A las 21.45 serra il president la radunanza ed ingrazcha a tuots pella preschentscha.

L'actuar

Mario Rauch